

# 2 ТИМОТ

## [1]

<sup>1</sup>Бурханы хүслээр Христ Есүс доторх амийн амлалтын дагуу Христ Есүсийн элч болсон Паулаас <sup>2</sup>өөрийн хайрт хүү Тимотод; Эцэг Бурхан ба бидний Эзэн Христ Есүсээс нигүүлсэл, өршөөл ба амар тайван байх болтугай.

<sup>3</sup>Би өөрийн залбиралдаа чамайг үргэлж өдөр шөнөгүй санахдаа эцэг өвгөдийнхөө үйлчилж байсан шиг цэвэр мөс чанараар өөрийн үйлчилдэг Бурханд би талархдаг. <sup>4</sup>Чамайг харахсан гэж тэмүүлэн, чиний нулимсыг санахдаа ч, би баяр баясгалангаар дүүрдэг. <sup>5</sup>Чиний доторх чин сэтгэлийн итгэлийн тухай дуртгалыг бодохдоо, анх чиний эмэг эх Лой, чиний эх Юник нарт байсан итгэл чамд ч бий гэдгийг би сайн мэдэж байна. <sup>6</sup>Энэ шалтгааны улмаас, миний гар тавигдсанаар чамд өгөгдсөн Бурханы бэлгийн дөлийг бадраахыг чамд сануулъя. <sup>7</sup>Учир нь Бурхан бидэнд айдсын сүнсийг бус, харин хүч, хайр ба биеэ захирахын сүнсийг өгсөн. <sup>8</sup>Тиймээс бидний Эзэний гэрчлэлээс бүү ич. Түүний хоригдол надаас ч бүү ич. Харин Бурханы хүчээр сайн мэдээний төлөө зовлон дотор надтай холбогд. <sup>9</sup>Бурхан биднийг ажил үйлсээр минь биш, харин Өөрийнхөө зорилго болон бүх л өнө мөнхөөс Христ Есүс дотор бидэнд соёрхсон нигүүлслийн дагуу аварсан. Тэр биднийг ариун дуудлагаар дуудсан байна. <sup>10</sup>Харин эдүгээ энэ нь бидний Аврагч Христ Есүсийн үзэгдсэнээр илчлэгджээ. Тэр үхлийг устган, амь ба үхэшгүй байдлыг сайн мэдээгээр дамжуулан гэрэлд авчирсан. <sup>11</sup>Үүний төлөө би тунхаглагч, элч, багшаар томилогдсон юм. <sup>12</sup>Энэхүү шалтгааны улмаас би мөн зовдог. Гэхдээ би ичдэггүй. Учир нь би хэнд итгэснээ мэддэг. Тэр надад хариуцуулсан зүйлээ тэрхүү өдрийг хүртэл хамгаалах хүчтэй гэдэгт би итгэлтэй байна. <sup>13</sup>Надаас сонссон эрүүл үгсийн жишээг Христ Есүст итгэх итгэл ба хайр дотор байлга. <sup>14</sup>Чамд хариуцуулсан сайн юмсыг бидний дотор оршдог Ариун Сүнсээр хамгаал.

<sup>15</sup>Ази дахь бүх хүмүүс надаас нүүрээ буруулсныг чи мэднэ. Тэдний дунд Фугел, Хермоген нар байсан. <sup>16</sup>Онесифорын гэрт Эзэн өршөөлөө соёрох болтугай. Яагаад гэвэл тэр олон удаа намайг сэргээж, миний гинжнээс ичээгүй. <sup>17</sup>Харин ч тэр Ромд байхдаа намайг хичээнгүйлэн хайж, олсон юм. <sup>18</sup>Ефест тэр хичнээн их үйлчилснийг чи сайн мэднэ. Тэр өдөр Эзэнээс өршөөлийг нь олохыг Эзэн түүнд зөвшөөрөх болтугай.

## [2]

<sup>1</sup> Иймд хүү минь, чи Христ Есүс дотор буй нигүүлсэлд зоригтой байгтун.  
<sup>2</sup> Олон гэрч нарын өмнө надаас сонссон зүйлсийг бусдад заах чадвартай итгэмжит хүмүүст даатга. <sup>3</sup> Христ Есүсийн сайн цэрэг адил надтай хамт зов.  
<sup>4</sup> Ямар ч цэрэг цэрэгт татагчдаа таалагдахын тулд өдөр тутмын амьдралын хэрэгт хутгалддаггүй. <sup>5</sup> Хэрэв хэн нэгэн нь барилдахдаа дүрмийн дагуу барилдахгүй бол шагнал авахгүй. <sup>6</sup> Шаргуу зүтгэдэг тариачин нь эхлээд ургацаа хүртэх ёстой. <sup>7</sup> Миний юу хэлж буйг эргэцүүлэн бод. Учир нь Эзэн чамд алив бүхний дотор ойлголтыг өгнө.

<sup>8</sup> Миний сайн мэдээний дагуу, Давидын үр сад болох үхэгсдээс амилуулагдсан Есүс Христийг санаарай. <sup>9</sup> Үүний төлөө би гэмт хэрэгтэн адил хүлэгдэж, зовлон эдэлж байгаа боловч Бурханы үг хүлэгдээгүй. <sup>10</sup> Энэ шалтгааны улмаас Христ Есүс дотор авралыг мөнх алдрын хамт тэдэнд авахуулахын тулд сонгогдсон хүмүүсийн төлөө би бүгдийг тэвчинэ. <sup>11</sup> Энэ бол итгэмжит үг мөн.

Учир нь хэрэв бид Түүнтэй хамт үхсэн юм бол,  
 Мөн Түүнтэй хамт амьд байх болно.

<sup>12</sup> Хэрэв бид тэвчвэл,  
 Мөн Түүнтэй хамт хаанчлах болно.

Хэрэв бид Түүнийг үгүйсгэвэл,  
 Мөн Тэр биднийг үгүйсгэх болно.

<sup>13</sup> Хэрэв бид итгэмжтэй байгаагүй бол,  
 Тэр итгэмжит хэвээрээ байна.  
 Учир нь Тэр Өөрийгөө үгүйсгэж чадахгүй.

<sup>14</sup> Эдгээрийг тэдэнд сануул. Сонсогчдыг сүйрэлд хүргэдэг хэрэггүй үгсээр бүү тэмцэлд хэмээн Бурханы оршихуйд чи тэдэнд чухалчлан тушаа.

<sup>15</sup> Чи өөрийгөө ичих явдалгүй ажилчин, үнэний үгийг зөв заагч гэж Бурханд сайшаалган харуулахыг хичээгтүн. <sup>16</sup> Харин дэлхийн ба хоосон үг ярианаас зайлсхий. Учир нь тэдгээр нь улам бүр бурханлаг бус байдал уруу хөтөлдөг аж. <sup>17</sup> Тэдний үг халдвартархдаг бөгөөд тэдний дунд Хуменай, Филет нар байна. <sup>18</sup> Тэд үнэнээс төөрөн одож, амилалт нь аль хэдийнээ болж өнгөрсөн хэмээн ярьж зарим хүмүүсийн итгэлийг бусниулж байна. <sup>19</sup> Хэдий тийм боловч Бурханы бат суурь нь хэвээрээ байна. Энэ нь "Эзэн Өөрийн хүмүүсийг таньдаг", "Эзэний нэрийг нэрлэгч хүн бүр бузар муу явдлаас хол байгтун" гэсэн тамгатай. <sup>20</sup> Том байшинд зөвхөн алт, мөнгөн сав суулга

байдаггүй. Мөн модон, шавран сав суулга ч байдаг. Зарим нь хүндэтгэлд, зарим нь жирийн үед хэрэглэгддэг. <sup>21</sup>Иймд хэрэв хүн өөрийгөө эдгээр зүйлээс цэвэрлэвэл, тэр хүн хүндэтгэлд зориулсан ариусгагдсан, Эзэндээ нийцсэн бөгөөд аливаа сайн үйлд бэлтгэгдсэн сав байх болно. <sup>22</sup>Идэр насныхаа дур хүслүүдээс зугт. Харин цэвэр зүрх сэтгэлээс Эзэнийг дуудагчдын хамт зөвт байдал, итгэл, хайр ба амар тайвныг мөрдөгтүн. <sup>23</sup>Харин мунхаг, эелдэг бус маргаанууд нь тэмцэл мөргөлдөөн бий болгодгийг мэдэх тул тэдгээрээс татгалз. <sup>24</sup>Эзэний боол тэмцэл мөргөлдөөнд оролцох ёсгүй. Харин бүх хүмүүст эелдэг зөөлөн ханд. Заах чадвартай, буруудаход тэвчээртэй байж, <sup>25</sup>зөрөлдөгсдийг төлөв байдал дотор засаж бай. Хэрэв магадгүй Бурхан тэдэнд үнэний мэдлэгт хүргэх гэмшлийг соёрхвол <sup>26</sup>тэд ухаан орж, диаволын торноос чөлөөлөгдөх буй. Учир нь диавол өөрийн хүслээр тэднийг хөдөлгөхийн тулд тэднийг олзлон авсан байжээ.

### [3]

<sup>1</sup>Эцсийн өдрүүдэд хэцүү цаг ирнэ гэдгийг мэдэж ав. <sup>2</sup>Учир нь хүмүүс өөрсдийгөө хайлрагчид, мөнгийг хайлрагчид, сагсуурагчид, их зантай, доромжлогчид, эцэг эхдээ захирагдахгүй, үл талархагч, ариун бус, <sup>3</sup>үл хайлрагч, эвлэршгүй, гүжирдэгчид, биеэ хянадаггүй, хэрцгий, сайныг үзэн ядагчид, <sup>4</sup>тэрслэгчид, бодлогогүй, биеэ тоодог, Бурханыг хайлрагчид байхаас илүү зугаа цэнгэлийг хайлрагчид болох болно. <sup>5</sup>Тэд бурханлаг байдлын дүртэй байх боловч түүний хүчийг нь үгүйсгэдэг. Чи ийм хүмүүсээс зайлсхийж яв. <sup>6</sup>Тэдний дунд айлд гэтэж ороод, нүгэлд автагдаж, зүсэн бүрийн хүсэл тачаалдаа хөтлөгдсөн сул дорой эмэгтэйчүүдийг олзолдог хүмүүс ч байна. <sup>7</sup>Тийм эмэгтэйчүүд үргэлж суралцавч, үнэний мэдлэгт хэзээ ч хүрч чадахгүй. <sup>8</sup>Ианн, Иамбре хоёр Мосег эсэргүүцсэн шиг, тэдгээр хүмүүс үнэнийг эсэргүүцдэг. Тэд ялзарсан санаа бодолтой, итгэлийн хувьд гологдсон хүмүүс юм. <sup>9</sup>Гэвч тэд илүү амжилт олохгүй. Учир нь тэр хоёрын мунхаглал бүгдэд илэрхий болсончлон, тэдний мунхаглал ч илэрхий болно.

<sup>10</sup>Харин чи миний сургаал, төлөв байдал, зорилго, итгэл, уужим сэтгэл, хайр, тэвчээр, <sup>11</sup>хавчлага, зовлонг дагасан. Антиох, Икониум, Лустрт надад тохиолдсон ямар хавчлагуудыг би тэссэн билээ. Эзэн намайг тэр бүгдээс аварсан юм. <sup>12</sup>Үнэндээ, Христ Есүс дотор бурханлаг амьдрахыг хүсэгч бүх хүмүүс хавчигдах болно. <sup>13</sup>Харин муу хүмүүс, мэхлэгч нар хуурч,

хуурагдан улам бүр бузар муу болно. <sup>14</sup>Харин чи хэнээс сурснаа мэдэж, юунд итгэсэн болон юу сурсан дотроо байнга бай. <sup>15</sup>Христ Есүст итгэх итгэлээр дамжуулан авралд хүргэх мэргэн ухааныг чамд өгөх чадалтай Ариун Бичээсүүдийг чи бага нааснаасаа мэдэх болсон. <sup>16</sup>Судар бүр Бурханы амьсгалснаар байгаа бөгөөд заахад, зэмлэхэд, залруулахад, зөвт байдал дотор чиглүүлэхэд тустай. <sup>17</sup>Энэ нь Бурханы хүн аливаа сайн үйлд бүрэн бэлтгэгдсэн байхын тулд юм.

## [4]

<sup>1</sup>Би Бурханы болон амьд ба үхэгсдийг шүүгч Христ Есүсийн оршихуйд Түүний үзэгдэлт ба хаанчлалаар чамд чухалчлан захья. <sup>2</sup>Угийг тунхагла. Цагаа олсон ч, олоогүй ч бэлэн байгтун. Уужим сэтгэлээр, сургаалаар зэмлэ, сануул, сэнхрүүл. <sup>3</sup>Учир нь хүмүүс эрүүл сургаалыг тэвчихгүй болох цаг ирнэ. Харин хүсэл нь тэдний чихийг гижигдэх аж. Тэд өөрсдийн хүслийн дагуу өөрсөддөө багш нарыг бөөгнөрүүлэх бөгөөд <sup>4</sup>тэдний чих үнэнээс эргэж, үлгэр домгуудад хандах болно. <sup>5</sup>Харин чи бүхний дотор саруул ухаантай бай. Мууг тэвч, сайн мэдээг дэлгэрүүлэгчийн ажлыг хий, үйлчлэлээ гүйцээ.

<sup>6</sup>Учир нь би хэдийнээ ундаан өргөл мэт асгагдсан бөгөөд миний явах цаг ирсэн байна. <sup>7</sup>Би сайн тэмцлээр тэмцсэн. Би замаа дуусгасан, итгэлээ сахьсан. <sup>8</sup>Ирээдүйд зөвт байдлын титэм нь надад зориулагдан зэхэгдсэн ажээ. Зөв шударга Шүүгч болох Эзэн намайг, зөвхөн намайг ч биш, Түүний үзэгдэхийг хүсэн хүлээгч бүх хүмүүсийг бас түүгээр шагнах болно.

<sup>9</sup>Над уруу даруй ирэхийг хичээгээрэй. <sup>10</sup>Учир нь Дем энэ өнөө үеийг хайлаж, намайг орхиод Тесалоник уруу явсан. Крек Галат уруу, Тит Далмат уруу явсан. <sup>11</sup>Ганц Лук надтай хамт байна. Маркийг өөрийнхөө хамт аваад ирээрэй. Учир нь үйлчлэлд тэр надад хэрэгтэй байна. <sup>12</sup>Харин би Тухикийг Ефес уруу явуулсан. <sup>13</sup>Чи ирэхдээ Тройд Карпынд орхисон миний дээл, номууд, ялангуяа илгэн арьсан дээрх бичгүүдийг авч ир. <sup>14</sup>Зэсийн дархан Александр надад их гай тарьсан. Эзэн түүнд хийснийх нь хариуг өгөг. <sup>15</sup>Чи бас түүнээс сэрэмжил. Учир нь тэр бидний үгсийг маш их эсэргүүцсэн юм.

<sup>16</sup>Миний анхны өмгөөлөл дээр хэн ч намайг дэмжсэнгүй. Харин бүгд намайг орхисон. Үүнийг нь тэдний эсрэг бүү тооцох болтугай. <sup>17</sup>Гэвч Эзэн надтай хамт зогссон бөгөөд тунхаглалыг надаар дамжуулан дэлгэрүүлж бүх Харь үндэстэнд сонсгохын тулд намайг тэнхрүүлэв. Би арслангийн амнаас

аврагдлаа. **18** Эзэн намайг алив бузар муу үйлээс гэтэлгэж, Өөрийнхөө тэнгэрлэг хаанчлалд аваачих болно. Түүнд алдар нь үеийн үед байх болтугай. Амен.

**19** Приска, Акул болон Онесифорын гэрийнхэнд мэнд хүргээрэй. **20** Ераст Коринтод үлдсэн. Харин Трофимын бие нь өвдсөн учир би түүнийг Милетэд орхив. **21** Өвлөөс өмнө ирэхийг хичээ. Юбул, Пуд, Лин, Клаудиа болон бүх ах дүү нар чамд мэнд хүргэж байна. **22** Эзэн чиний сүнстэй хамт байг. Нигүүлсэл та нарт байх болтугай.